



N° 1277
Entrée le 03.10.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 04.10.2024

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Chambre des Députés Ministère de l'Agriculture, de l'Alimentation et de la Viticulture	Chamber vun den Deputéierten
Référence : 640/2024	8
- 4 OCT. 2024	
A traiter par :	Lëtzebuerg, den 02/10/2024
Copie à :	

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministesesch fir Landwirtschaft, Ernährung a Wäibau weiderzeleeden.

Virun e puer Joren haten d'Piraten eng Diskussioun iwwert d'Pelzverkafsverbuuet an der Chamber ugestouss. An enger Aktualitéitsstonn zum Thema gouf vun eiser Säit eng Motioun (n° 3031) proposéiert, an där d'Regierung opgefuerdert gouf, de Verkaf vun Zuuchtpelzer ze verbidden. Dës Motioun gouf net vun de Majoritéitsparteien uegholl.

An der Äntwert op d'parlamentaresch Fro n°5214 hat den deemolegen Landwirtschaftsminister dunn informéiert, dass hien den 28te Juni um EU-Agrarministerrot, zesumme mat 5 anere Ministeren, eng Initiativ iwwert de Verbuuet vun der Pelzdéierenzucht an der EU virgestallt huet. *"Dës Delegationne waren sech eens, dass d'Haltungskonditiounen vun de Pelzdéieren net kompatibel mat minimalen Ufuerderungen un den Déiereschutz sinn, dass d'Zucht an d'Déiden vun Déieren nëmme fir hire Pelz ethesch net verrietbar sinn, an dass dofir d'Pelzdéierenzucht an der EU sollt progressiv verbuede ginn. [...] Eng ganz Rei vun EU-Memberstaaten ënnerstëtzen ee Verbuuet vun der Pelzdéierenhaltung an der EU"*.

Zum aktuellen Zäitpunkt reegelt d'lëtzebuergesch Déiereschutzgesetz, dass d'Produktioun vu Pelzer zu Lëtzebuerg verbueden ass. Dës Regelung verbitt awer net de Verkaf vu Pelz, deen aus dem Ausland importéiert gëtt. Deemno gëtt d'Pelzindustrie an déi domadder agoend Déierequälerei just an aner Länner verlagert.

An deem Zesummenhang wéilt ech der Ministesesch dës Froe stellen:

1. Kann d'Ministesesch informéieren, wéi de Stand vun der Initiativ iwwert de Verbuuet vun der Pelzdéierenzucht an der EU ass?
Wéi vill Reuniounen goufen et zënter der Äntwert op d'Fro 5214?
2. Ënnerstëtzt déi aktuell Regierung d'Demarche vun der Virgängerregierung?
3. Wéi eng Partnerlänner huet de Minister identifizéiert, déi d'Approche vum Pelzverbuuet deelen?

Mat déiwem Respekt,

GOERGEN Marc
Deputéierten



www.piraten.lu



**Äntwert vun der Ministesch fir Landwirtschaft, Ernährung a Wäibau op d'parlamentaresch Fro n° 1277
vun dem éierbaren Deputéierten Marc Goergen**

1. Kann d'Ministesch informéieren, wéi de Stand vun der Initiativ iwwert de Verbuet vun der Pelzdéierenzucht an der EU ass?

Wéi vill Reunione goufen et zënter der Äntwert op d'Fro 5214?

Am Joer 2022 ass eng Europäesch Biergerinitiativ (ECI) mat dem Titel „Fur Free Europe“ enregistréiert ginn. D'EU-Kommissioun huet dorops am Dezember 2023 geäntwert a verschidden Aktiounen virgeschloen.

Enner anerem ass d'EFSA vun der EU-Kommissioun mandatéiert ginn, fir e wëssenschaftlechen Avis ze ginn iwwert den Déiereschutz an der Pelzdéierenzucht. Dësen Avis soll 2025 verëffentlecht ginn.

Weiderhin hat d'EU-Kommissioun ugekënnegt, dass si eng Evaluatioun wäert maache vun der EU-Labeling-Veruerdnung fir Textilien, an d'Méiglechkeet wäert ënnersichen, fir en obligatoresche Labeling vun der Präsenz vun Déierepelz a Kleeder anzeféieren.

Schliisslech soll d'EU-Kommissioun fir 2026 eventuell e legislative Virschlag virbereeden, deen e Verbuet vun der Pelzdéierenzucht wéi och vum Handel mat Déierepelzer an der EU kéint virschloen.

Um Niveau vun den EU-Ministerei ass de Sujet di leschte Kéier am Juni 2023 diskutéiert ginn, ob Basis vun enger gemeinsamer Ufro vun Däitschland, Éisterräich an Holland, ënnerstëtzt vun der Belscht, Zypern, Tschechien, Estland, Litauen, Lëtzebuerg, Slowakei a Slowenien.

Dës Länner hunn sech dofir ausgedréckt, dass d'EU-Kommissioun en EU-weite Verbuet vun der Pelzdéierenzucht an hiren zukünftege legislative Virschléi am Beräich Déiereschutz sollt integréieren.

2. Ënnerstëtzt déi aktuell Regierung d'Demarche vun der Virgängerregierung?

Di aktuell Regierung ënnerstëtzt d'Initiative vun der viregter Regierung, wat de Verbuet vun der Pelzdéierenzucht an der EU ubelaangt.

3. Wéi eng Partnerlänner huet de Minister identifizéiert, déi d'Approche vum Pelzverbuet deelen?

Verschidden EU-Memberstaaten ënnerstëtzen de Verbuet vun der Pelzdéierenzucht an der EU, ënner anerem déi Länner, déi am Punkt 1 opgezielt sinn.

Donieft hunn och nach Kroatien, Irland, Italien, Lettland a Malta op nationalem Plang d'Pelzdéierenzucht verbueden.

Lëtzebuerg, den 24. Oktober 2024

(s.) Martine Hansen

Ministesch fir Landwirtschaft, Ernährung a Wäibau